



元代史書二卷

元代
史料刊叢
初編

黃山書社

西夏書事卷三十七

青浦 吳廣成西齋

宋孝宗隆興元年

金大定三年

夏天盛十五年春正月使

賀金正旦

使人爲武功大夫芭里昌祖宣德郎楊彥敬昌祖
後官至殿前太尉彥敬由翰林學士進參知政事
二人皆爲夏國名臣

按

昔夫子作春秋無事必書首時朱子作綱目
無事必書年數所以備遺也西夏自宋南渡後

記注關佚惟金史交聘一表畧存歲時朝聘梗槩而所誌職官姓氏可補散亡故備錄之

三月使賀金萬春節

使人爲武功大夫訛留元智宣德郎程公濟

夏五月禁奢侈

夏俗習功利尙忠勇地處沙磧不事耕織國多世祿之家悉以奢侈相高故仁孝下令禁之

按

是時夏政益可觀矣夫雕文刻鏤錦繡纂組非獨傷農事害女紅而民俗之澆淳國用之虛

實亦因之故漢文示敦樸而家給人足隋文崇
儉約而統一兵強自古然也仁孝奢侈之禁或
有見于此噫弗可及已

秋七月金使來市馬

金主遣使至權場市馬仁孝不敢拒

九月金使來賀生日

使臣爲宿直將軍僕散習尼

冬十月始使謝金橫賜

先是金宿直將軍阿勒根和衍來橫賜仁孝使金

西夏書事

卷三十一

二

吾衛上將軍蘇執禮匭使李子美往謝

按

金史交聘表熙宗皇統五年書橫賜夏國海

陵正隆元年又書而夏之報謝使至是始見知

史文遺佚正多也

隆興二年

金大定四年

夏天盛十六年春正月使賀金正

旦

金制宋使朝辭庭賜禮物夏使就賜于會同館時

武功大夫鬼喙執信宣德郎李師白禮對嫺雅金

主嘉之特賜衣各三對人從衣各二對使副幣帛

百四十段金鍍銀束帶三金塗銀闊裝鞍轡三金塗銀渾裹書匣間金塗銀裝釘黑油詔匣及包書詔匣祇各一復賜人從銀二百三十五兩絹二百三十五疋其後遂爲定制

二月以翰林學士焦景顏兼樞密都承旨

景顏性嚴毅守正不阿嘗與副都承旨任純忠論事純忠恃得敬勢強辨不肯下景顏面斥其奸仁孝知純忠理屈諭解之擢景顏職

三月使賀金萬春節

使人爲武功大夫紐臥文忠宣德郎陳師古

秋八月贈野利仁榮爲廣惠王

褒其制蕃字功也

九月金使來賀生日

使臣爲宿直將軍完顏烏里雅

冬十一月遣使如金乞免索人口

先是金邊吏奏夏人雖歸城砦而掠去人口財畜
未歸因索之仁孝遣殿前太尉梁惟忠等奏告曰
衆軍破蕩之時幸而免者十無一二繼以凍餒死

亡其存幾何兼夏國與宋兵交人畜被俘戮者亦
多連歲勤動士卒暴露勢皆賸削又爲宋人牽制
使忠誠之節無由自達中外咸知願止理索不勝
下國之幸金主不許

乾道元年

金大定五年

夏天盛十七年春正月使賀金正

旦

使人爲武功大夫訛羅世宣德郎高嶽嶽官至樞
密直學士歷世通顯至孫良惠爲夏國相

二月莊浪族隴逋隴拜二門從西蕃首領結什角叛

降于金

莊浪族屬祈安城其族有四曰吹折門密臧門隴
逋門龐拜門雖屬夏國叛服不常結什角者西蕃
董璫後璫子巴璫角歸宋賜姓名趙順忠子永吉
孫世昌皆受宋官襲把羊族長金人定陝西授世
昌忠翊校尉已爲鬼蘆族長京臧所殺金人誅京
臧以世昌子鐵哥爲把羊族都管大定四年宋兵
破洮州鐵哥弟結什角與母走喬家族避之喬家
族首領播逋與木波隴逋龐拜丙離四族耆老大

僧等共立結什角爲太波四族長號曰王子其地
北接洮州積石軍其南隴通族南限大山八百餘
里不通人行東南與疊州羌接其西丙離族與盧
甘羌接其北隴拜族與夏國容魯族連界結什角
念金爲父報仇常欲歸附會金臨洮尹移刺成使
人招諭結什角率木波丙離及隴通隴拜等族舉
地降于金

三月使賀金萬春節

時中國復與金和遣禮部尙書洪适等賀節夏使

同入見

夏五月任得敬營西平府

得敬志篡夏國欲以仁孝處瓜沙已據靈夏于是役民夫十萬大築靈州城以翔慶軍監軍司所爲宮殿盛夏溽暑役者糜爛怨聲四起

秋八月遣使如金

賀金主受尊號

九月金使來賀生日

使臣爲宿直將軍木虎蒲查

冬十一月后罔氏卒

罔氏內教謹嚴宮中莫敢犯仁孝諸善政多所贊成至是疾卒遺言以優禮大臣勤治國事爲囑

按

罔氏贊成諸善政爲西夏賢后后卒而夏之

善政不復見矣惜哉

乾道二年

金大定六年

夏天盛十八年春正月使賀金正

旦

金主御大安殿受朝賀使人武功大夫高遵義宣德郎安世隨皇太子百官入賀及賜宴侍坐者皆

有定員爲制

二月任得敬以莊浪族亂告于金請兵滅之不許
得敬以隴逋等族叛遣人諭不從乃以莊浪族違
命作亂欲興兵翦除告金主不知隴逋龐拜二門
舊屬夏國報以將檢會其地所屬毋擅出兵

三月使賀金萬春節

賀節使武功大夫曹公達宣德郎孟德達押進知
中興府趙衍至金金主詔使人初見朝辭命于左
掖門出入朝賀賜宴由應天門東偏門出入示禮

敬也

復乞金免索人口

仁孝遣御史中丞李克勤樞密都承旨焦景顏奉表復請金主方許之

夏四月金使來橫賜

使臣爲宿直將軍斜卯摑刺仁孝遣使謝

秋七月以賀義忠爲御史中丞

義忠以精敏稱初授監察御史行部所至吏民肅然仁孝知其賢進中丞

九月金使來賀生日

使臣爲翰林待制移刺熙載

冬十月任得敬以兵攻莊浪族吹折密臧二門滅之
隴逋龐拜二族歸金請每年進馬馳百匹金主嘉
其慕義時遣能吏撫綏賞賜加厚二族因誘吹折
密臧二門潛附得敬遣毀前太尉任得聰將兵二
萬襲吹折二族破之悉攜其資財人畜

乾道三年

金大定七年

夏天盛十九年春正月使賀金正

旦